

खबरां श्रुति खजुरिया कोला

1. संसद दा बजट सत्र राष्ट्रपति हुंदे अभिभाषण कन्नै शुरू होग।
2. प्रधानमंत्री नरेंद्र मोदी होर अज्ज नमीं दिल्ली च सालाना एनसीसी पी.एम रैली गी संबोधित करडन।
3. राष्ट्रपति द्रौपदी मुर्मू होरें भारत यूरोप संघ बश्कार मुख बपार समझौते पर खुशी जाहिर कीती।
4. एशिया दा सभनें थमां बड्डा नागर विमानन कार्यक्रम ते प्रतिष्ठित हवाई प्रदर्शन विंग्स इंडिया-2026 अज्जै थमां हैदराबाद च शुरू होआरदा ऐ।
5. अंडर-19 क्रिकेट च भारत नै कल मेजबान जिम्बावे पर 204 रन दी शानदार जित हासल कीती ते ग्रुप-2 च शीर्ष थाहर पर आई गेआ।

<><><><><><>

#### All Party Meet

संसद दे बजट सत्र थमां पैहले सरकारै कल सर्वदलीय बैठक सददी। केंद्री रक्षा मंत्री राजनाथ सिंह होरें बैठक दी अध्यक्षता कीती। राज्यसभा च सदन दे नेता जे.पी नड्डा, संसदीय मामलें दे मंत्री किरेन रिजिजू, पार्लियामानी मामलें दे राज्यमंत्री अर्जुन राम मेघवाल ते डॉ. एल मुरुगन इस मौके पर मौजूद हे। कांग्रेस नेता जयराम रमेश, तृणमूल कांग्रेस नेता सागरिका घोश, समाजवादी पार्टी दे सासद रामगोपाल यादव हुंदे सने कई लोक मौजूद हे। बैठक मगरा पार्लिमानी मामले दे मंत्री होरें आक्खेआ जे बजट संत्र दी शुरुआत राष्ट्रपति हुन्दे

अभिभाषण कन्नै होग ते फीह् धन्नबाद प्रस्ताव पर चर्चा होग ते फीह् बजट सत्र दी शुरुआत होग। किरण रिजिजू होरें सारी पार्टिं थ्वा सत्र गी सूचारु ढंगे सिर चलाने दी अपील कीती।

<><><><><><>

#### PM-NCC Rally

प्रधानमंत्री नरेंद्र मोदी होर अज्ज नमीं दिल्ली दे कैरियाप्पा परेड मैदान कैरियाप्पा प्रेड ग्राउंड च एनसीसी पीएम रैली गी संबोधित करडन। इस ब' रे दी रैली दा विशे ऐ राष्ट्र पैहल कर्तव्य निश्ठा युवा। एह रैली भारत दे युवाएं च कर्तव्य, अनुशासन ते राष्ट्री प्रतिबद्धता दी भावना गी दर्शादी ऐ। एनसीसी पी.एम रैली च म्हीने भर चलने आहले एनसीसी गणतंत्र दिवस शिविर-2026 दा भव्य समापन समारोह होग। इस कैंप च देसै दे 2 जहार 406 एनसीसी कैडेटें दी शमूलियत दिक्खने गी लब्बी जिंदे च 898 महिला कैडेट्स हियां। इस रैली च 21 विदेशी मुखें दे 207 युवा ते अफसर बी हिस्सा लैडन।

<><><><><><>

#### Yuva Gram Sabha

पंचैती राज मंत्रालय, शिक्षा मंत्रालय ते जनजातीय मामलें दे मंत्रालय आसेआ सांझे तौरा पर अज्ज नमीं दिल्ली च राष्ट्री पुरस्कार समारोह च आदर्श युवा ग्राम सभा दे जेतुएं गी सम्मानित कीता जाहग। पंचैती राज मंत्री एस.पी सिंह बधेल ते शिक्षा राज्यमंत्री सुकांत मजूमदार इस मौके पर मौजूद रौहडन। छात्रें,

शिक्षकें ते पंचैती राज प्रतिनिधिं सने करीब 900 प्रतिभागी उत्थे मौजूद रौहडन।

<><><><><><>

Prez. EU India

राष्ट्रपति द्रौपदी मुर्मु होरें आक्खेआ ऐ जे भारत ते यूरोप समकालीन हितें कन्नै गै लोकतंत्र, बहुलवाद ते खुली बाजार अर्थव्यवस्था जनेए साझा मूल्यें कन्नै जुड़े दे न। उने आक्खेआ जे तेजी कन्नै बदलदे वैश्विक परिवेश च एह सिद्धांत दोन पक्खें दा मार्गदर्शन करा'रदे न। राष्ट्रपति मुर्मु होरें कल संजा राष्ट्रपति भवन च यूरोपीय परिषद अध्यक्ष एंटोनियो कोस्टा ते यूरोपीय आयोग अध्यक्ष उर्सुला फॉन डेर लायेन हुन्दे सम्मान च आयोजित रूट्टी पर अपने संबोधन च आक्खेआ जे आर्थिक सहयोग भारत-यूरोपीय संघ सरबंघें दा प्रमुख थम्म ऐ। उने आक्खेआ जे भारत ते यूरोपीय संघ व्यापार ते निवेश गी साझा समृद्धि ते सामाजिक प्रगति दे साधन दे तौर पर दिखदे न। राष्ट्रपति मुर्मु होरें भारत-यूरोपीय संघ मुक्त व्यापार समझौते पर ऐतिहासिक सफल गल्लबात पर खुशी जाहिर कती। ते आक्खेआ जे इसदे कन्नै दोन देशें दे लोकें दे जीवन च सकारात्मक बदलाव औग। राष्ट्रपति होरें आक्खेआ जे पिछले दो दहाके च भारत-यूरोपीय संघ रणनीतिक साझेदारी टकोदे तौर पर मजबूत होई ऐ। उने आक्खेआ जे एह स्थिर, संतुलित ते नियम-आधारित अंतर्राष्ट्रीय व्यवस्था गी आकार देने च दोन पक्खें दी सामूहिक आकांक्षा गी दर्शान्दा ऐ।। उने आक्खेआ जे यक्कोतक्की

ते संघर्ष दे मौजूदा दौर च भारत ते यूरोपीय संघ वैश्विक स्थिरता बनाई रखने दी जिम्मेदारी साझे तौर पर निभा र दे न। राष्ट्रपति होरें आक्खेआ जे एह सहयोग साफ तौर पर कूटनीति, बहुपक्षवाद ते शांतिपूर्ण सह-अस्तित्व दे समर्थन दा सनेहा दिन्दा ऐ। राष्ट्रपति मुर्मु होरें आक्खेआ जे यूरोपीय संघ दे नेताएं दी यात्रा दौरान भारत-यूरोपीय संघ बश्कार सुरक्षा ते रक्षा साझेदारी रक्षा उद्योगें आस्तै नमें मौके खोलोग। उने आक्खेआ जे भारत स्वच्छ ऊर्जा, जलवायु वित्त पोषण ते प्रौद्योगिकी दे क्षेत्रें च यूरोपीय संघ दे कन्नै सहयोग होर मजबूत बनाने लेई उत्सुक ऐ। राष्ट्रपति होरें यूरोपीय संघ दे नेताएं दा सोआगत करदे होई आक्खेआ जे गणतंत्र दिवस पर मुख्य अतिथि दे तौर पर उन्दी मौजूदगी ते भारत दे गणतंत्र दिवस समारोह च यूरोपीय संघ दी पैहली बारी भागीदारी खास महत्व रखदी ऐ। ते एह आपसी प्रगाढ़ता ते इक-दूए पर दोन पक्खें दे भरोसे गी दर्शान्दा ऐ।

<><><><><><>

### Wings India-2026

एशिया दा सबने थवा बड़ड़ा नागर विमानन कार्यक्रम ते प्रतिष्ठित हवाई प्रदर्शन "विंग्स इंडिया-2026" अज्जै सोयां हैदराबाद च शुरू होआरदा ऐ। चार दिने दे इस कार्यक्रम दा सरिस्ता नागर विमानन मंत्रालय ते फिक्कीन दे सहयोग कन्नै कीता जा'रदा ऐ। विंग्स इंडिया वैश्विक विमानन प्रमुखें, नीति निर्माताएं ते उद्योग जगत दे सरबन्धी घडें गी किट्ठे लेईए औग ते विमानन क्षेत्र च भारत

दी बददी ताकत, नवाचार ते क्षमताएं गी प्रदर्शित करने आस्तै इक प्रमुख मंच दे तौर पर कम्म करग। चार दिन रोमांचक हवाई प्रदर्शनों दी इक श्रृंखला आयोजित होग। प्रमुख अंतरराष्ट्रीय विमानन कंपनियें दे कन्नो कन्नी अगुवाह भारतीय कंपनियें दी हिस्सेदारी दे कन्नै, एह हवाई प्रदर्शन विंग्स इंडिया 2026 दे प्रमुख आकर्षणें चा इक होने दी मेद ऐ। एह आयोजन तेजी कन्नै उभरदे वैश्विक विमानन केंद्र दे तौर पर भारत दी स्थिति गी मजबूत करदा ऐ। इसदे च 20 मुख्यें थवा डेलीगेशन हिस्सा लैरदे न जिन्दे च रुस, सिंगापुर, मालद्वीप, मंगोलिया, ओमान, यूरपिय संध, फ्रांस, जर्मनी, अमरीका शामिल ऐ।

<><><><><><><>

### Pradhan UGC

सरकार नै भरोसा दिता ऐ जे विश्वविद्यालय अनुदान आयोग-यू.जी.सी. दे नमें दिशा-निर्देशों दा मकसद शिक्षा परिसरें च जाति-आधारित फरकोफरकी गी रोकना ऐ। शिक्षा मंत्री धर्मेंद्र प्रधान होरें संवाददाताएं कन्ने गल्लबात करदे होई आक्खेआ जे एह केंद्र, राज्य सरकारें ते यू.जी.सी. दी जिम्मेदारी ऐ जे फरकोफरकी दे नां पर कानून दा गलत इस्तेमाल नेई होए। उने आक्खेआ जे एह मामला सर्वोच्च न्यायालय दी निगरानी च ऐ ते सारी कार्रवाई संविधान दे दायरे च गै कीती जाग। 13 जनवरी गी जारी इक नियम च यू.जी.सी. नै आक्खेआ हा जे उच्च शिक्षा संस्थानें गी जाति आधारित या कुसै बी चाल्ली दी फरकोफरकी कन्नै निबडने आस्तै समान अवसर केंद्र, समता समितियां,

शिकायत निवारण प्रणाली ते 24 घंटे चलने आहली हेल्पलाइन स्थापित करना अनिवार्य ऐ। सरकार मूजब इने उपायें दा मकसद सारे छात्रें आस्तै सुरक्षित ते मता समावेशी शिक्षण वातावरण बनाना ते भेदभाव विरोधी ढांचे गी मजबूत करना ऐ।

<><><><><><><>

Under-19

अंडर-19 क्रिकेट विश्व कप दे सुपर-सिक्स चरण च कल बुलावाओं च भारत नै मेजबान जिम्बाब्वे पर 204 रनें दी शानदार जीत कन्नै ग्रुप 2 अंक तालिका च शीर्ष थाहर हासिल करी लैती। विहान मल्होत्रा ने नाबाद 109 रन बनाकर भारत गी 50 ओवरें च 352 रनें दे विशाल स्कोर तक पजाया। विहान दा शतक टूर्नामेंट च भारत दा पैहला शतक हा। 14 बरे दे प्रतिभाशाली खडारी वैभव सूर्यवंशी नै 30 गेंदें च 52 रनें दी तूफानी पारी खेलिए टीम गी मजबूत शुरुआत दिती, जिसलैकि विकेटकीपर बल्लेबाज अभिज्ञान कुंडू नै 61 ते खिलन पटेल नै 30 रनें दा योगदान दिता। भारत नै गेंदबाजी च जिम्बाब्वे गी 37 ओवरें चार गेंदें च छडे 148 रनें पर ऑल आउट करी दिता।

<><><><><><><>

IMD

मौसम विभाग नै कल्लै तगर दिल्ली, हरियाणा, पंजाब, चंडीगढ़, हिमाचल प्रदेश, उत्तर प्रदेश, मध्य प्रदेश, राजस्थान ते बिहार च घना कोहरा छाए रौहने दा

अनुमान लाया ऐ। हिमाचल प्रदेश, पंजाब, चंडीगढ़, हरियाणा ते दिल्ली च अगले दो सोयां त्रै दिनें तकर सीतक लैहर चलने दी संभावना ऐ। उप-हिमालयी पश्चिम बंगाल ते सिक्किम च गरज ते एन गडा पौने दी पेशगोई कीती गेई ऐ। उत्तराखंड, बिहार, पूर्वी उत्तर प्रदेश, छत्तीसगढ़ ते पूर्वी मध्य प्रदेश च बिजली कड़कने ते तेज हवाएं कन्नै गरज दे कन्ने वरखा होग। विभाग मूजब, मन्नार दी खाड़ी ते कोमोरिन क्षेत्र च शुक्रवारे तकर तूफानी मौसम रौहने दे आसार न।

<><><><><><>

CISF

केन्द्रीय औद्योगिक सुरक्षा बल-सीआईएसएफ 'वंदे मातरम कोस्टल साइक्लोथॉन 2026' नां कन्नै दुई कोस्टल साइक्लोथॉन आयोजित करोग। एह साइकिल रैली अज्जै सोयां अगले म्हीने दी 22 तरीख तकर चलोग। गृह राज्य मंत्री नित्यानंद राय अज्ज नमी दिल्ली सोयां साइक्लोथॉन गी वर्चुअल माध्यम कन्नै हरी झंडी दस्सिए रवाना करडन। राष्ट्रीय गीत वंदे मातरम दे 150 बरे पूरे होने दे मौके पर इसी आयोजित कीता जा र दा ऐ। सीआईएसएफ दी दो साइकिलिस्ट टीम किट्ठे पूर्व च पश्चिम बंगाल दे बखाली ते पश्चिम च गुजरात दे लखपत किले सोयां अभियान शुरू करडन। एह यात्रा लगभग 6 हजार 500 किलोमीटर दी दूरी तय करिए केरल दे कोच्चि च संपन्न होग।

<><><><><><>